

COMUNICATO n. 1869 del 04/07/2025

La proponetes les vegnarà valutèdes da na Juria internazionèla

Pest Arge Alp 2025, l'é stat troà fora i finalis del Trentin

[Ladino] Sostegnir i projec che a na vida inovativa, originèla e da poder endò portèr dant, proa a ge dèr ai joegn di raions alpins prospetives neves: l'é chesl l'argument zentrèl del Pest ARGE ALP 2025, tel an olache l'president l'é chel de la Provincia autonoma de Trent, ades tel moment de la selezioms te duc i raions membres de la Comunanza de lurier.

La juries dal post, defat, se à binà per valutèr la candidadures manèdes ite da scoles, firmes e start-up, e l'Trentin l'à troà fora si finalis da portèr dant a la juria internazionèla: i projec mané ite dal designer Alessio Remundo, con “ADES - Restituire valore alla manualità artigiana per dare un futuro alla montagna in Trentino” e da l'Istituto Tecnico Economico-I.T.E. Antonio Tambosi de Trent con “Progetto Valle dei Laghi”.

La juria internazionèla, che tol ite un espert per vigni Nazion (Tèlia, Austria, Germania e Svizra), la troarà fora i venjidores dant de la metà de setember, enveze la zerimonia de premiazion la vegnarà endrezèda en ocajion de la 56eisema Conferenza di Capi de Goern de Arge Alp, ai 23 e ai 24 de otober del 2025 a Trent.

I trei projec miores de la doi categories pervedudes dal avis i se spartirà l'pest de 10.000 euro en dut: 2.500 euro per l'prum, 1.500 per l'secondo e 1.000 per l'terzo.

Chesta la sumèda di projec troé fora.

“ADES - Restituire valore alla manualità artigiana per dare un futuro alla montagna in Trentino”
Projet portà dant da Alessio Ramundo per la categoria “Firmes e start-up”.

De gra a la colaborazion anter designer, artejegn e comunanzes dal post, l'projet sostegn la produzion de mobilia e cosses de legn e lin, fates con tecniches tradizionèles e materièi naturèi. L'inom “ADES”, che per dialet trentin vel dir “adesso”, l'sotrissea l'besegn de fèr en prescia. L'projet no se cruzia demò de la produzion, ma l'vel educhèr, formèr e meter a jir n'leam che reste tel temp anter generazioms. L'é n'model che se pel portèr endò dant e che valorisea la mont desche lech de davegnir, no demò de recorc. De gra a na colaborazion con tislères e tescères dal post, vegn sport percorsc de formazion pratica te la berstot. ADES engaisa a meter su de neva micro firmes, colaborazioms anter designer e artejegn. Sia vijion ambientèla la é responsabola e con n'picol peis. I materièi che vegn durà, desche l'legn e l'lin, i é naturèi, dal post e renovaboi. Estra apede l'met a jir na rei anter profescionis e generazioms che ge dèsc forza al sentiment de partegnuda e ai jogn a restèr tel raion. L'leam co la mont no l'é demò estetich, ma economich, formatif e sozièl.

“Progetto Valle dei Laghi”

Portà dant da l'Istituto Tecnico Economico-I.T.E. Antonio Tambosi de Trent per la categoria “Scoles”, sorastant de la scola Amdrea Bezzi. L'projet, de doi egn, l'se focalisea su la mont desche n'lech da valorisèr da n'pont de veduda del marketing del teritorie, con chela de endrezèr evenc sportives col obietif de viventèr l'turism fora de sajon tel raion tout ite, la Valle dei Laghi. L'é stat tout ite la clas terza del percors turistich

de “manager del sport sostegnibol” che l à metù a jir n analisa del raion da n pont de veduda morfologich e idrografich, storich, sozio-economich e n analisa di monumenc de emportanza storica. Estra apede, ge vegn dat na gran emportanza a l’azessiboltà, inclujion e sostegniboltà. L focus l é soraldut sun vèlch sport, se perveit estra apede la valorisazion e l miorament di fabricac di zentres storics, de gra a na colaborazion col network OSPITAR, coscita da smaorèr a na vida sostegnibola l numer de pos let a la leta. Con chela de meter en esser neva oportunitèdes per n turism “chiet” e neva oportunitèdes de luirer per i joegn. L projet l é amò più rich de gra a la valorisazion de prodoc tipics dal post desche l Vino Santo, l elech extravergine, formaes, ciarns, fruc e miel.

Arge Alp l é na Comunanza de lurier metuda su ai 12 de otober del 1972 a Mösern, tel Tirol, con chela de ge fèr front e sostegnir i besegnes de duc i raions de la Èlpes e che tol ite presciapech 26 milions de persones. I membres de Arge Alp l é la Germania col Stat Ledech de Baviera, l’Austria col Länder Vorarlberg, Tirol e Salisburgh, la Tèlia co la Provinzes autonomes de Busan e de Trent e la Region Lombardia, la Svizra coi Chantun Grischun, Son Gagl e Tessin.

Desèria [chiò](#) la intervistes

Traduzion di Servijes Linguistics e Culturèi del Comun general de Fascia

<https://www.youtube.com/watch?v=g9Xqq2qv2OE>

<https://www.youtube.com/watch?v=t3tc0cTMYpk>

(cdt)